

甘肅府縣志輯

中國地方志集成

民國重修鎮原縣志(四)

中國地方志集成

甘肅府縣志輯 ②⑧

民國重修鎮原縣志(四)

鳳凰出版社 ● 上海書店 ● 巴蜀書社

重修鎮原縣志卷之十四

耆舊志續編

清道光二十六年邑宰江西李從圖刊刻張志後忽忽近百年矣生其間者如果事出非常凡屬有心人皆能搜剔遺軼不使失墜鎮原地處偏僻人不里閭庸言庸行無人爲之表章歷時既久雖以鎮原之人索故鄉遺事亦不可得況清同治時之回亂民十七年後之甘肅大亂地經破壞事易湮沒卽傳聞甚確尙有訛傳失真之慮文獻所關不絕如線及今不記後將渺茫矣因就採訪所得彙爲一冊名曰耆舊志續編見者亦知其大概云爾

文學

劉之蕓字梧岡清嘉慶二十五年庚辰科進士翰林院庶吉士官貴州普安直隸廳同知丙子科貴州鄉試內監視人品孤高學問文章具有根柢書法超妙尤入晉人之室惟性情疎闊自知不宜於宦場呈請開缺修墓旋里後閉戶著書非公事未嘗入衙署京中大僚時遣專足來求書其聲價可知矣同治兵燹後求片紙隻字不可得

張輝祖清貢生候銓訓導少有大志屢踏黃槐連不得志於有司乃欲箸書立說以抒其懷抱久之則又自焚其藁鄉人某詢其故則曰我所言者已言於古人口矣案頭有志書某取而閱之有所謂錢志者清康熙時邑宰錢志彤所刊蘭所刊邑生董繼舒之舊藁也有所謂錢志者清康熙時邑宰錢志彤所刊

邑貢生張述轅之舊藁也有所謂陳志者嘉慶時邑宰陳琪繁所刊邑舉人
劉化鵬福建舉人陳琚繁之所編纂也此三書者各有所長亦各有所短某
謂輝祖曰縣志未修久矣以君之學識本舊志以成新志此不朽盛業也盍
勉旃輝乃杜門謝客發篋陳書起草於嘉慶十年藁凡七易殫竭心力至嘉
慶十五年庚午秋七月始告成未及付諸手民病卒卒後三十六年江右李
從圖以名翰林出宰鎮原見輝祖原纂志書藁喜其用力勤取材富用意微
迺邀約邑紳相與參互攷訂且益以後來諸事稍爲變其體裁之不合者時
前翰林院庶吉士劉梧岡之藹解組歸田復爲之校閱於是壽諸棗梨邑人
士家置一編矣

慕維城字紫珊甘肅鎮原縣人清道光庚子科進士道光二十年任石泉縣
縣無城堤二十餘年矣議修者多難之維城至紳民相慶以爲侯名如是必
能爲保障而維城亦以是爲任踰年乃集紳士勸捐鳩工擇公正爲之經理
不假胥吏故人人樂輸而事有成歷經四年之久積勞數病將完工而調蒲
城百姓留之不克維城語余曰以瘠苦之區而謀百年保障任怨任勞數載
未遑尙望後賢之成此事也其惓惓如是

錄陝西石泉縣志

附遊涇州宮山七律八章其一云別却名山已十年偶攜芒屨踏蒼煙石隄一轉一奇
徑恍似重遊小洞天其二云路繞羊腸緩緩行滿山花放不知名青蒼最是祠前柏參
入雲霄作雨聲其三云轉眼雲霞腹底封徘徊繞寺前松濤聲入耳從空起涇汭飛
來二白龍其四云青鳥不來梵宇閒樹間流水響潺湲舉頭忽見林梢月猶憶當年獻
白環其五云漢時曾獻紫霞觴盛宴猶聞說穆王流水依然八駿杳白雲黃竹總荒唐
其六云呈華殿上殿瓊筵彷彿空來海外仙縱使碧桃能結實人生那得幾千年其七

云依然空際湧樓臺瑤宇琳宮面面開坐久清風吹兩袖此身宛在小蓬萊其
八云歸路仍尋舊石隄鳥聲啼破夕陽低無詩轉恐山靈笑招得白雲筆下題

張欽修字毅菴清道光辛巳科舉人司鐸三水多所造就歸田後與廩生慕
啓運結詩社引導後學嘗言作詩須有蒼然之色有蔚然之光有鏗然之音
非徒大話炎炎明七子詩有光有音然多是空架子又言世未有不學古人
而能爲詩者也然初則求與古人合終則求與古人離否則刻舟求劍欲自
成一家難矣又言中智以下以詩取敗者有之朋姦飾僞者有之怨望訕國
者有之揣合低昂梯取榮寵者亦有之故作詩不可不慎迄今莘莘士子略
知聲韻學者前輩提倡之力居多

附陝西三水縣學署可以居記其文曰廣廈果大乎吾不得而知也蝸廬果小乎吾亦
不得而知也夫吾所知者謂何謂吾心有之所可耳當見世家大族樓閣連亘居誠壯

矣而其人時有跼蹐之形以其心有所不可也又見一椽之覆僅蔽風雨而有人焉披吟其間泊如也曠如也以其心有所可也善乎高景逸云凡人之患生於有所不足有所不足生於有所不可無所不可斯無所不足斯無所不樂余每三復其言因想見其爲人適以署東徧之敝屋半間葺而新之敝其簷牙可以賓月之來疎其窗格可以延風之爽入其室可以容膝別置几榻惟室之適時而擁書一編可以晤古人時而讀書咫尺可以論萬里審如是也安往而不可以樂哉因書以名軒

又退廬記其文曰道光丙申嘉平余以司鐸來三水署後有地半弓垣墉傾圯榛莽雜焉幾嘆退無餘步矣越明年爰進同學諸君子商之因藉其力作室三間落成後顏以退廬爲暇日講學之地焉夫學期於進而廬以退名者何也易有云尺蠖之屈以求信也龍蛇之蟄以存身也余老矣大率退息之意多而諸君子通方致用其自期正未有艾然苟能洗心藏密深維乎退之義而無曠乎退之功則無躁進之心者必無倖進之患卽他日置身玉堂而同憶當年雨晦風濤聚首一室未必不相視而笑莫逆於心也若夫余於公餘之暇退處斯廬門無投刺徑擁落花聽時鳥變聲看閒雲出岫不覺心曠神怡自適其適方是時諸君子不速而來燕茗香淪苦茗相與傾談有暢余之所欲言觸余之所未發者而余亦自此進矣

李清瑞字輯堂號蓮溪孟壩鎮人清咸豐戊午科舉人已未成進士初選河

南閬鄉縣知縣改授陝西米脂縣知縣旋主講關中書院講得一省英才而教育之領鄉薦捷南宮者多出其門故長安有要中舉拜蓮溪之語或問作文秘訣答曰羿之射造父之御右軍之書宜僚之弄丸昭明之鼓琴梓慶之削鑠丈人之承蜩庖丁之解牛孫伯樂之相馬僧智緣之診脈公孫大娘之舞劍與夫紀昌視蝨大如車輪射之貫心而懸不絕朱子言劉晏見錢流地上是其會計之熟所致凡一技之擅長一事之專精皆得其獨以有成讀書之道亦如是而已矣故肉爛則易於咀嚼書熟則易於驅遣文章本天成妙手偶得之其熟之謂乎聞者互相傳誦後署延川永壽等縣知縣加同知銜在任以直隸州知州用有善政絃歌載道以病卒於任所

附延川縣觀風告示其文曰照得論秀書升士子之潛修有素觀風問俗宰官之責任攸關是以太史陳書司徒備職我國家昌明文運敷鴻教於八埏在多士砥礪躬行奮鵬程於萬里固已山陬海澨一道同風戶誦家絃和聲鳴盛矣惟茲延邑舊屬雍州嶺號禪梯山名官道峰頭橫黛結成一邑屏藩谷口流霞瀉出千般氣象響水之潭可禱石油之井能然柳院書聲聽深處呬唔之韻延關飛渡任中流自在之行地既鍾靈人多毓秀士紳質樸絕無奔競之風庠序教嚴不尙偏頗之習李表則服官廉介輿論允孚劉最則制行端方鄉人推重他如情敦古道關子慶儒行堪師教逮諸孫曹漢俊者德足式旣古人垂型而作範望來者踵事以增華本縣技乏雕龍才難造鳳世守青湘之業學慚黃絹之辭鐵硯將穿名謬題於雁塔金泥乍報登先忝夫龍門捧檄而來敢誇製錦代庖以治欲效鳴琴聊小住之爲佳亦留連而覽勝雖烽煙數載儘多白屋之貧而燈火十年豈墜青雲之志况譚中丞備籌膏火力學有資任賢宰預定章程吹竽無濫亟用觀摩大爲振起爰定於四月十一日舉行觀風爲此示仰閭邑生童知悉先期預備試卷臨時聽候點名干戈之後化以詩書而士氣愈揚兵燹之餘加以磨練而文章益顯何妨盡一日之長權當作終朝之樂或文追李杜不少光芒或賦擅齊梁偏多香豔或衣看染汁李固言彈指音先或句剪和羹王沂公狀頭信早爾多士禮修面北效出谷之新鶯在本縣術鮮指南愧識途之老馬詩取他山之攻玉易占麗澤之交朋聊分鶴俸之微資用佐驪珠之貴寶看今歲秋高桂樹棘闌之姓字留香待來年春暖杏林翰苑之聲名著顯特示

焦國琢縣北原唐家窪望族幼穎悟讀書數行下其兄炳林謂其所親曰此
吾家之選哥也年十九中清咸豐辛酉科舉人與同縣慕暉同榜壬戌會試
薦不售其鄉試座師懷遠何廷謙以才堪造就勸留京求經濟有用之學旋
考取覺羅教習時則同治元年秋也後聞渭南回亂甘回響應久不得家書
倉皇出京二年寇氛日熾鬱鬱不得志以死死後十餘年部選岷州學正
李清鑑字鏡堂號蓮舫清瑞同懷弟也清同治癸酉科舉人光緒丙子恩科
進士籤分雲南初權沾益州調任羅次縣知縣羅次俗強悍民多爲盜兼之
土豪劣紳阻力紛生清鑑多方開導猛以濟寬不數月民乃從化有龔遂守
渤海之風

趙君璜字瑞丞蕭金鎮人少以文學騰聲於時清光緒丙子舉於鄉其兄君璽亦爲是科副榜有清一代蕭鎮讀書人得題名於鴈塔者自君璜昆仲始鄉人冀其激昂青雲爲宗族交遊光寵僅一試禮闈卽杜門不出結廬山阿負杖閱耕陶陶乎有物外意邑宰敬其爲人聘主中峯書院講邑人稱爲老綽山長對後之趙槐村而言其講學也務實踐貴刻苦有顏李遺風又明術數之學嘗夜觀天象自言自語書院肄業生問之不答再問之君璜曰諸君不聞敦煌索統之說乎世間可學者多何必以有用心力投諸無何有之鄉主講中峯十餘年後以疾終於家無子以姪文卓承繼

案晉索統明天文術數人問吉凶統曰攻乎異端戒在害已惟以占夢爲悔吝游雅數以災異問高允允曰知之甚難復恐漏洩不如不知天下妙理至多何遽問此北齊權會明

風雨玄象學徒有問不言曰此術可知不可言有一子亦不授也

包中廉字介亭清光緒四年鄉貢註冊候銓訓導晚年主中峯書院講循循守禮法光緒庚子後樞府主張變法書院諸生私議之中廉聞而言曰太平之世朝無秕政民無謗言且經世之道宜通其變不可以膠柱諸君何見之小也尙其少安毋躁邑宰宋運貢以中廉學識兼優爲一邑人望諸事輒往詢焉其一生事實運貢序文中言之綦詳錄後

附邑侯宋運貢包介亭八秩壽序其文曰包姓爲鎮原望族代有傳人自靜若太翁孝友性成敦行志學家學乃有淵源介亭之伯父煥若翁由增生爲鄉飲介賓亦以文學名得疾喘症公侍奉醫藥朝夕維謹弱冠遊泮丕振家風及其長也又以績學稱同治間陝回肇亂縣城失守人多罹難公檢點掩埋俾無暴露堂弟樸公早世遺孤均幼爲之養生送死未幾其侄又歿爲之擇嗣養孀所遺田廬悉歸嗣子其遠房無嗣可承者遺產皆爲之清釐歸入祭田以隆報本公之孝友睦族有如此者同治八年蜀軍統領黃公鼎克復縣

城廖公曉東來宰鎮原凡建衙署招流亡興養立教諸大政皆延公爲之勛勳後任左公下車仍留公佐理由是重修文廟再造書院散放牛具籽種及地方一切公益公皆與焉公之急公好義有如此者光緒歲庚寅劉子培任內奉文清賦有建議設局丈地者公謂縣境寥闊恐滋擾累不若令紳民呈報原額民不勞而事易舉劉公然之任公經理公任勞任怨期年而辦有成數不累一夫澤流梓里以視夫籌款設局累及閭閻而因以爲利者相去遠矣公敬恭桑梓有如此者光緒丁酉汪大令稟庵履任時訪友事之人於前任張敬丞敬丞首以公對庚子辛丑大饑汪大令稟借銀二千兩倉糧四千石又借江南義賑銀二千兩委公總理賑務公編查有序全活甚衆邑民感其無私汪公喜其有勞公之救災恤患有足多者公由廩貢例得教職札催驗看公不肯往迨汪稟庵爲之稟請酌委一次以酬其辦賑之勞督憲批批准聞同時勸駕公初心未改不圖仕進公之淡泊明志有足多者旋以前借庫款札催歸還公以闔邑稟懇張大令雲卿詳請豁免經督憲批據情入告奉旨允准是舉也固朝廷如天之仁而亦公之仁心仁言所造成也鎮原地丁每一兩納錢二千二百文鹽課亦每兩納錢壹千玖百文近因銀價太賤民力不支公與余晤談懇請減價余毅然應之此亦實惠及民之一端也光緒甲辰余聘公主講中峯書院訓迪有方多士景從學憲許公舉公優生獎以性行淑均公授徒數十年成就甚衆入庠食餼舉明經者指不勝屈化雨春風教亦多術盛矣哉其爲文言簡意該詞寓箴規與夫碑記屏文壽序均膾炙人口邑乘自咸豐元年迄今未修余屬公修之初藁已脫五十餘年事蹟記表志傳條理秩然尙矣鎮原之人感念公德景仰共殷製錦爲文敬詠其德而

屬余識其大者如斯乃稱觴登堂而祝之曰涉茹水登潛山會耆英集羣賢孝肅家風齒德兼全秦松漢柏玉貞金堅靈椿不老蘭桂滿前耄耋斯頤可得長年大德必壽敢告後賢

附慕壽祺壽介亭山長詩云壽考由來愛作人無邊桃李一時新齋心立遍門前雪煉氣蒸成座上春講學大都能變夏尊經多恐再燔秦潛夫臺下書聲滿隴塞如今有鳳麟

劉蘭馨字炳生清乾隆癸卯科解元化鵬之孫性慷慨有大志不屑屑爲章句之學其父曾由舉人知安徽蒙城縣蘭馨隨任讀書留心政治習公牘文字並閱孫子十三篇等書咸豐初太平天國據東南王師由安徽進攻蘭馨聞之喜曰此吾舊游地也乃仗策謁軍帥時正在需人之際帥重用之多所建樹由附生保知縣署安徽亳州知州帶義勇軍兼管露布事務後以功保知府同治時回籍修墓卒於家

焦炳林字午村清恩貢生天資穎悟經術湛深亂後設帳於家一如在鳳翔時頗得善誘之方從學者衆游泮水食稟餼領鄉薦捷南宮者均有人矣

慕迪吉縣西門外稠水溝人字惠之清光緒丙子科舉人原任西甯縣教諭升任鞏昌府教授主講中峯書院著有隴西五李考一卷

許鏞字紹笙西鄉許家河灣人清光緒丙子歲貢生屢薦不售主中峯書院講嘗評孔門弟子資質曰剛明莫若顏子溫粹莫若仲弓穎悟莫若子貢篤實莫若子夏開闊莫若曾點深穩莫若漆雕開並作贊語各書於木主後

劉景虞字小橋清貢生就教歷署會甯環縣訓導河州學正晚年與鄉人慕障研究性理之學郵筒往還無虛日清咸豐時障從廩生劉午橋先生遊午

橋者景虞父也景虞能守其父所遺之書

慕璋字霽堂鎮原人清咸豐辛酉中副車次年回亂倡練鄉團護村堡後賊勢益熾全家殉難璋徑從提督雷正綰軍誓滅賊復讎總督左宗棠駐平涼檄權固原學正雷正綰任固原提督仍延入幕訪殉難諸節義數十陳當道得入奏獲旌丙子舉於鄉官西甯教諭修大成典禮設義塾百二十區逆回陷湟中婦女殉節者歲久家貧湮而不彰璋爲訪查舉報在西甯十年陞甯靈廳教授後卒於任箸書見藝文目錄

錄省志

張宸樞字紫垣號少堂敦敏耆學少卽知名工書法善詞章以清乙酉科拔貢舉乙酉科鄉試部選莊浪縣學訓導啓迪後學綽有儀範無事卽染翰臨